

4. Maj 2017

Angajoqqaarsiat atugaasa pitsannorsaavigineqarnissaat aningaasatigullu paaqqinninnerminni tigusartagaasa qaffaavigineqarnissaat, taamatutaaq nerisaqarnermut, atisarsiutissat, kiisalu kaasarfimmiorisartakkanut aningaasartuutaasartut ullutsinnut naapertuuttunngorlugit naleqqussarneqarnissaannik Naalakkersuisut peqquneqarnissaannik Inatsisartut aalajangiiffisassaattut siunnersuut.

(Inatsisartunut ilaasortaq Laura Táunâjik, Siumut)

Inatsisartunut ilaasortap Laura Táunâjik Siumut siunnersuutaanut imaattumik oqaaseqassuugut.

Siullermik Siumumiit angajoqqaarsiaasartorpassuit periarfissaq manna atorlugu qamannjavik pisumik qutsavigeqqaarusuppagut meerannguit ajunngitsumik isumassorneqarnissaannik siunertaqartumik isumaginnittarnerannut, naak amerlasuutigut namminneerlutik ilaqutariittut mikisunillu meerartaqarsimagunik piffissaq nukiillu annertuut atortarmatigit aammalumi naatsorsuutiginnigisaminnik aningaasartuuteqartariaqartarnerannut.

Ukiut kingullit arlalissuanngorput meerannguit pillugit sakkortuumik oqallittualersimagatta.

Meerannguit sumiginnarneqarsimappata allatulluunniit isumassorneqarnikkut eqqunngitsumik pineqarsimappata akisussaaffiagaagallartarput meeqqaat ilaqutariinnut allanut isumagisassanngortillugit.

Qujanartaqaaq ilaqutareeqarmat meeqqanik utaqqiisaa sivikinnerusumik sivilunerusumilluunniit meerannguanik paarsigallarnissamik akuersisartunik. Ilaqutariillu taamatut tunniusimallutik sukkuilluunniit saffigineqarlutik piareersimajuannartut iluatigisorujussuugut.

Ullumikkut angajoqqaarsiaasartunut ajunngitsorsiasat ukiuni arlaqalersuni naleqqussarneqarsimanngillat. Isertuunneqarsinnaanngitsumillu oqaatigisariaqarparput meerannguit sumiginnaasimanerup kinguneranik angajoqqaarsiaqalersinneqartariaqarsimasut misilittakkat takutinnikummassuk nereriaaseqarnikkut ilaatigut allarluinnaasartut.

Tamannalu imaannaanngitsorujussuuvoq pingaartumik isorliunerusuni illoqarfinniluunniit minneru-suniissimagaanni suna tamarmi illoqarfinnut angisuunnut naleqqiullugit nioqqutissat/nerisassat aki-suneruffiini. Aammalumi atisaarniarfiit akikinneqqaattut akornanni pisiniarfiusinnaanngittuni.

Angajoqqaarsiatut aningaasat pisartakkat ukiorpaalussuit matuma siornali allanngortinneqarsiman-ngittut nerisassanut atisassanullu taamaallaat atussallugit naatsorsuutigineqarsinnaanngillat.

Aammali eqqiluisaarnernut, sunngiffimmi sammisassanut assigisaannullu soorunami aamma atorneqartussaapput.

Ulluinnarni aamma meeqqat allat assigalugit peqatigiiffinnut/timersoqatigiiffinnut kultooritigut sammisassanut allanulluunniit meeqqat akuuffigerusutaannut namminerlu kaasarfimmioqartaria-qarnerannut aningaasartuuteqarnissaq aamma naatsorsuutigineqassooq.

Tassalu naatsumik oqaatigalugu meeqqap piginnaatitaaffii eqqortumik naammassiniarneqassappata pisortat namminneq suliaqarnerisigut angajoqqaarsianut inissiinermi qulakkeerneqartussaavoq atukkatigut allatuulli naapertuuttumik naligiimmilluunniit atugaqarnissaq.

Taamatut oqaaseqarluta aapassaaneerneqarnissaanut sukumiisumik peqqissaartumillu suliarine-qarnissaa inassutigaarput. Naalakkersuisuniillu inassutigineqartumi ukiamut pinissaa Siumumiik ilalerlugu.

Jess Svane

Siumut